

四庫全書

集部

欽定四庫全書

集部

范文正集補編卷

四
五

詳校官監察御史_臣查善長

檢討_臣何思鈞覆勘

總校官編修_臣王燕緒

校對官學正_臣周 鉉

謄錄監生_臣謝 惇

欽定四庫全書

范文正集補編卷四

碑記

祭文附

蘇州郡學范文正公祠記

承德郎平江路總管郡推官汪澤民為文并

書中奉大夫江南諸道行御史臺經歷台

哈巴哈篆額

吳學之興始於文正范公此所以專祠公也宋景祐初

天下郡縣未有學公守吳請而建焉吳為公父母之邦
向得錢氏南園地將居之或謂是必世生公卿即以其
地為學宮公之子恭獻公持節過郡益新學給田由是
立祠禮殿後忠宣公恭獻公從祀高賢報本典禮宜備
至元再元春正月鬱攸及祠屋幾燬明年文學掾蔣君
伯昇至顧瞻摧圯懼神弗居告諸郡守掄材木陶甃瓦
撤故朽完補缺棟宇隆敞像設儼肅秋九月始事冬十
二月工迺告成工為日凡若干錢為緡凡若干郡守通

議道童公乃為署祠之扁蔣君偕公八世孫文英來言
曰公之祠於是也久矣若稽歲月紀載闕焉不書之石
昌詒永圖願記之澤民惟聞氣哲人問學本乎六經蹈
履合乎仁義元勲鉅德蔑以形容方慶厯中召對天章
閣列奏十事三曰精貢舉既用其說學校徧天下矣嘗
聘安定胡先生幸教吳士嗟乎興學立師羽翼斯道豈
淺淺哉祭法禦大菑捍大患於一時猶得祀之若公之
功施於天下後世豈惟吳學宜祀之凡有學者皆可祠

也夫奉常固以致嚮往隆報效士之朝夕仰瞻又豈無感發希賢之心者乎澤民夙仰公之高風隨牒公之鄉屢常拜公之像今復以文字寓名祠下何其幸耶遂不辭而為之記又明年歲在丁丑正月壬子記

文正書院記

遂昌鄭元祐撰

至正五年龍集乙酉夏六月吉廉訪僉事趙公承僖分巡中吳至則首謁范文正公祠下拜瞻廟貌起敬起慕

作而言曰文正公以德以功既無忝伊傳之為輔相以學以識則有功於洙泗道統之傳故其具文武全才出將則安邊却敵入相則尊主庇民其先憂後樂與先知覺覺後知覺者何以異豈非聖之任者乎其平生論諫直道正言剴切人主至上百官圖詆宰執為張禹觸犯盛怒雖坐摧抑曾弗少阻詎不猶木從繩則正而欲后之克聖者乎當時天下郡縣未嘗皆置學公至吳首以已地建學故學校徧天下者自公始識泰山孫明復於

貧賤中授以春秋遂大鳴聖道於時延安定胡公入太學為學者師而河南程叔子實遇獎拔其後橫渠張子以盛氣自負公折之而授以中庸卒之關陝之教與伊洛相表裏蓋自六經堙晦聖人之道不傳為治者貿貿焉罔知道從以至於公而後開學校隆師儒造就士類作成忠義之風以致道統之傳則公之學識於名教豈小補哉公之薨也所在廟食一以忠烈賜名顧茲中吳公父母之邦所宜大建祠廟萬世血食如之何僅享之

於私第况今國朝崇德報功在在有書院以祠先賢豈有豐功偉德正學卓識如文正公而書院莫之建則是缺典豈有大於此者乎公八世孫文英具辭於趙公以為先公之功德學識誠如公所言顧惟范宗仰食於義廩食指幾千餘使建書院則官除山長有山長則有廩稍之奉矣今藐焉義廩不自給使但建書院以祀公慎選族人之賢者充主奉斯足矣官除山長則乞免焉於是公從其言時總管古燕吳侯秉彝聞公之所建明即

叙公所言請於行省上之中書議有關世道且不設教
官而以居嫡者世主祠而行教於事便由是二公商出
公帑羨餘命工益址而崇制既宏且固甫完屬元祐記
之祐以葺爾膚謏烏敢廁一喙於大賢之門雖然公之
功德學識憲僉公知而言之則凡天下之士皆知道之
也知其人而不思效之可乎子朱子謂人之立志必當
以公自期待况遊於公之門乎况郡人乎若然庶於公
可無負所謂尚友者此也元祐言不腆謹用復諸憲僉

公俾書之石焉

康熙十七年閏三月九日從友人太倉顧伊人涓借得元鄭明德先生僑吳集

錄之應俱李提舉文並存家乘中不可失也世孫必英識

重脩文正書院記

翰林院脩撰承務郎郡人張益謨文 奉政

大夫脩正庶尹吏部郎中兼翰林侍書廣平

程南雲篆額 郡人鄒肩書丹

肆惟我國家敦崇教化尊尚儒賢其於前代良臣誼弼
功德及人而廟祀於郡邑者必命守臣嚴祀事葺祀宇

示勸之意不既深乎顧在守臣之賢乃克視此為重而盡心焉蘇郡實宋太師魏國文正范公桑梓之里而其先隴義莊義宅義田義學咸在故公之祠堂久建於此事詳舊刻西江况侯伯律以奉政大夫禮部郎中奉敕來守茲郡政敷民安百廢並舉嘗有事於祠下顧瞻棟宇有圯撓者因喟然曰茲責在我弗急所圖曷稱上意即請於朝用加脩治於是卜日鳩工度材築基撤舊易新拓小以大為祠堂前後各五楹後以奉公神像前置

累朝碑刻東西有廊廡東祠宋郡守潛公咸淳中始建是祠者也堂東偏為書院構用舊材以其尚堅好也院亦有堂前後各三楹揭以忠厚舊扁東西有廡齋宿閣牲以及庖湍莫不有所其西偏則范氏家廟歲寒堂在焉子孫歲祀公父子於其中外為門屋三間亦仍以文正書院舊額揭之垣墉周繚規制宏壯視昔有加凡所用度一皆出粟之羨貯於官者經始於宣德甲寅六月三日畢工於九月十日况侯謹率僚屬暨學官諸生合

范氏子孫以落其成主奉元理及提管希賓爰與族人謀曰祠宇再新既賴郡守盍磐石鐫辭用著不忘遂以屬余余忝為公郡人於斯盛事在所當述故不敢辭以蕪陋惟公間氣所生心與學術俱正毅然有為於世奈何周旋中外政府方登讒慝已構雖其才不盡展乃若功德之及人者尚多節義足以厲俗進退綽綽非古之所謂大臣者何能與於此乎當時苟能盡用必將成就大業以濟天下此蓋君子所深惜也然而公之自立於

天地間者百世不泯祠當百世愈新况侯為郡賢守克
承上意亟致脩治宜乎在郡多善政也詩云伐柯伐柯
其則不遠斯之謂歟故余特為之書正統五年歲在庚
申夏四月吉日裔孫提管元英掌計子惠子寧元靖希
歐照磨子易教諭從文知縣希正希域義學師希鳳立
石何淵鑄

重修忠烈廟記

資善大夫吏部尚書兼經筵官前國史總裁

泰和王直謨 奉政大夫脩正庶尹吏部郎
中賜食三品祿直文淵閣永嘉黃養正書

中憲大夫太常寺少卿兼經筵侍書廣平程

南雲篆

正統八年十一月蘇州府重修范文正公忠烈廟成其
十一世孫都察院照磨子易具事始末屬直為之記蓋
公蘇人也曾祖徐國公祖唐國公考周國公皆葬蘇之
天平山公嘗請於朝改天平山白雲庵為白雲禪寺世

度僧守焉作祠於寺之右以奉祀事至公之子孫又作祠於是寺之南以祀公然忠烈之名未有也宋自元昊反西鄙騷動師出無功仁宗乃命公經畧公選將練兵築城寨壑屯田據其要害示以形勢招徠屬羌恩信大洽決策取橫山復靈武元昊勢屈乃請降西人仰公之德服公之化皆為公置生祠公薨相與哭於祠下者累日不絕宣和間宇文虛中為慶帥言公忠於朝廷其功烈顯於西土至今猶廟祀益虔然廟未有額徽宗命以

忠烈名之且為題其榜凡廟之在西者皆易以新名然蘇猶未有也紹興以來西土皆陷忠烈之廟越在異邦蘇之守令與其士大夫謀曰蘇公故郡也而天平山則公祠墳在焉公之精神必往來乎此乃更作新廟揭忠烈之榜於廟門由是蘇始有忠烈廟每歲上巳郡縣長吏率其屬致祭歲久廟壞元至元乙酉嗣孫邦瑞士貴復新之末世兵亂毀焉踰八十年未有能復之者至是工部侍郎廬陵周公忱巡撫至於蘇而監察御史壽光

劉君甄武昌劉君仕昌錢塘鄭君顥皆以事蒞焉郡守
李侯從智來會政事之暇語及茲廟因相與歎曰公之
德業著於當時傳於天下後世不繫乎廟之有無也然
表先生以儀來今使後生小子得瞻其廟貌想其精忠
偉烈而興企慕之心則廟亦不可無也乃各出貲俾吳
縣令永嘉葉錫圖其成錫毅然以身任之殫心盡力規
畫處置凡隣邑之令佐皆以貲來助市良材命衆工為
堂前後各三間以奉公及三世先公像東西廂如其數

以藏祭器而齋宿寓焉壯麗嚴整有加於昔中作石橋
橋南左右為碑亭前作大門榜曰勅賜范文正公忠烈
廟經始於是年九月初九日閱兩月而廟成直聞之士
之能任天下之重者必以天下為心心之欣戚主乎人
而不私於已是以天下為心者也以天下為心則人庶
乎有濟矣初公未顯時已欲任天下之重嘗曰士當先
天下之憂而憂後天下之樂而樂夫憂人之憂而欲免
其憂使人皆樂然後與之同其樂此豈小丈夫然哉孟

子曰禹思天下有溺者猶已溺之稷思天下有飢者猶已飢之公之心猶是也故其德業之盛不愧乎古人豈特著於西土也哉嗚呼士不以天下之重自任者多矣不以天下之重自任則其所行一主於為己人之利害不少繫於其心而又悻悻然自以為得功烈之卑無足怪也而所以為士者固當如是耶然則公之孫與邦之人士及四方之來者拜公之廟慕公之功業必當思公之心充之以仁義而力行之於公其殆庶幾乎故為之

記而道愚之所聞使刻之石以告焉凡以貲來助者其
姓氏皆載之碑陰正統十年秋八月癸丑日立 郡人
何淵鐫

重建文正書院記

詔賜章服閒居前太史中執法經筵講官翰
林學士知制誥奉天翊衛推誠宣力守正文
臣特進光祿大夫柱國武功伯兵部尚書兼
華蓋殿大學士東海徐有貞撰并書 賜進

士及第翰林國史脩撰儒林郎文華殿講讀

官長洲陳鑑篆額

宋有天下三百載視漢唐疆域之廣不及而人才之盛
過之此宋之所以為宋者也蓋自太祖而後十有五君
君德莫盛於仁宗前後輔政之臣幾百數十人才亦
莫盛於仁宗之朝就仁宗朝之人才論之蓋莫盛於范
文正公公之為人剛大清純天資忠孝而為學得聖賢
之心庶乎所謂極高明而道中庸者故其為臣表裏一

誠始終一正而文武經緯備焉公事仁宗自秘閣登諫垣出入侍從守郡帥邊多所涉歷而不得久處於朝及參大政方將拯時復古權倖間之曾不期月而去凡所建明旋亦更革公之所存十不施其四五然而勲業德望之盛視彼久於其位者猶倍蓰焉使其久且盡施則宋之為宋當不止是矣於乎甚矣直道之難行也有君如仁宗有臣如文正公其猶若此此有志於世者所深惜也公之同時名臣莫如韓魏公富鄭公魏公於公每

事推重而鄭公因事感歎至擬公於聖異時大儒莫如
朱文公文公謂公傑出之才為天下第一流而吳澂氏
亦謂公為百代殊絕人物之數公者豈無所見而言哉
是以後之君子聞風而起者未嘗不稱公之為盛也凡
公所嘗過化之地皆有祠吳中公之故鄉而文正書院
故義莊也其祀事自宋元暨國朝列於嘗典春秋享之
而其祠宇因故歲寒堂為之屢毀屢葺規制未宏迺者
今大司寇萬安劉公顯攷以都憲奉璽書巡撫南圻而

臨是邦因謁公祠顧瞻興懷爰諮所司撤舊為新闢而宏焉協議以贊其圖者前郡守黃巖林侯一鶚前郡守瓊臺邢侯克寬承命以董其工者吳邑主簿南昌李崇也於是公之十二世孫主奉祠事從規來以記請有貞聞之君子之於道也其有所立也必有所宗也求乎今而不足則尚友乎古之人所謂世異而道同者也今夫都憲公之巡撫於斯也猶文正之經制於陝右河東也兩郡侯之繼守於斯也亦猶文正之為治於蘇潤饒越

也事文正之事也心文正之心也是亦文正而已矣然則三君子之於公豈非所謂世異而道同者歟有貞於公幸為鄉之後學固嘗寤寐乎公而思所企及者其能自已乎哉雖不文也願執筆焉附名於三君子之後以庶幾夫高山景行之意云成化二年歲次丙戌春三月望日立石

重修文正書院記

書院在蘇城中吳縣西隅通衢之上祀宋大賢范公之

祠也按范之先世自北徙南而居於吳公生於武寧官舍長仕中朝而薨於徐子孫奉其柩葬河南萬安山而祠於是者以公父母之邦且其地本范氏舊業公嘗經理作義莊以贍宗族者也當宋咸淳丙戌太守潛說友始請於朝立專祠祀公元末至正甲戌郡守吳秉彝又奏改為書院而以公之贈諡表其門閭舉其族之嫡嗣主奉祀事義莊田宅悉附天平山三太師墓所逮際昌朝大新禮制遂以書院登諸祀典春秋祭享郡之官屬

次子可車自書

得以祠事白公公曰事神治民敦崇風化郡邑首務有
或不然非憲體所當究乎夫事有經權時有可否貴在
變通使無偏廢可也矧先賢祠宇風化所關宜亟行之
勿怠吾亦為之處焉用是親詣祠中纖悉畢視默運冥
思酌量措置悉付長洲令劉輝典史張灝董之而責其
成令廉慎老成謹於趨事曾未踰時凡祠之敝者一撤
而新之言言赫赫加於舊觀邦之士庶來瞻來仰靡不
驚歎莫究所繇蓋是圖也材給於上而官不知費力役

於下而民不告勞神享其成而族賴以庇一舉而衆美
悉具非善於謀敏於事而公於心者未易臻此衆方落
成會監察御史戴公巡歷至郡詣祠見之極加稱賞曰
盛事也不可無紀於是令與主奉數過丘園以記為請
予惟文正公之高風大節彌兩間而冠百世者登諸國
史載諸郡乘而雜出於譜傳紛播於品題者不可勝書
至今庸人孺子一聞公名皆知敬仰故其平生所至存
有生祠沒有廟祀者不約而同於以見秉彝好德之誠

不以古今彼此而有間也况公父母之邦精神手澤所在則凡生於斯仕於斯者有不加之意乎是宜賢監司良守令之用情於是也第顥晚生末學淺見寡聞不能加豪末以光盛事為慊然嘗聞之記者取記其事實信今傳後不失其真乃可故敢原其始末畧其彌文而為之直書云侍御公名魁字士元高唐人戴公名仁字以德句容人郡侯名瑀字汝器蠡吾人皆以進士歷顯融所至有聲不係諸此不書 成化十七年歲次辛丑九

月既望大中大夫山西等處承宣布政使司右參政太
原祝顥著 奉訓大夫南京兵部武選清吏司員外郎
長洲李應禎書篆 邑人陳俊刻

許墅鎮宋文正公范先生書院記

先生蘇人也許墅蘇地也原非居里書院祀焉矯俗也
蘇之往哲多矣獨處者就人所知耳前乎先生固有其
人後乎先生亦未嘗無人先生去今四五百年卓然之
風青天白日許墅談者了了如見先生何所待而興其

豪傑之士歟予觀所為之事皆今人所當為者茲辭墅
出風氣之表躡遺芳而著聞者幾人耶使先生所為矯
情媚世以大其美則不可為矣惑於一時隨後攻之矣
欺於無知者難逃於具目矣今猶能大理於口耶使先
生所為戾於人情之常亦不必為矣根乎天理之正不
奪於私順乎人心之同不牽於怪今何憚而不為耶使
先生所為優入聖域非衆人一蹴可到而為之不及猶
可諉也人皆可以為堯舜奚先生之有哉人自絕之先

生始孤高於前矣能自奮者肯曰我之形骸欲役倫羣
類聚靈於萬物造化賦予無少虧欠其志行獨不肖人
道誰其厄之寧不負所生哉企其懿去其不懿務去其
媿求至其企企之弗至弗措焉業儒也豫天下事於曾
中擴良心以有為義理所在礪礪落落舉而措之篤近
舉遠毋顧忌毋退遜毋戾毋比毋襲毋俟毋已有隨所
處而惠澤流行不逐逐於虛聲而寡實效窮達一致泰
如也先生之矩步的矣身雖齊民不死其良心推平旦

之好惡達於膠擾之際由家庭而宗族隣里鄉黨交與
勉為忠厚而狡詐是恥老窮不遺強不犯弱衆不暴寡
自拔鄙陋而惇爽矣今許墅也誰其人歟盖有之矣苦
傳畏咻莫予其歸也安得懿其俗哉予固設義塾敦教
事矣見廣福菴右畔別墅一所幽邃軒豁林木蓊樾日
惟藜族賭博蠹俗尤甚令顧澤輩推餘工葺頽益新玲
瓏戶牖堅甍屏壁創重門拓院落充廣翼宇完潔堦砌
暨牖煥然邪塑盡撤設先生木主於中堂歲時特牲祀

之揭扁樹碑以昭不朽屏浮蕩之迹寓諸生肄業昕夕
仰瞻而企慕脩為誘之孔易矣有來於堂均得觀感則
勸弘矣競力全好則先生之懿不擅於一身不止於一
時不拘於一方受賜衍賜沛然無既矣猶或有無自待
焉得謂之學哉得謂之人哉唯肄業諸生脫落自強為
民之先可也或有過其齊民之望不知予之初意也風
俗所以難振釣是人也晞驥驥乘晞顏顏徒存乎其人
不甘自誣何難哉或謂非後學之極致予恐作輟相勝

戶庭難跂足也行遠登高此莫非發軔之地尋向上去
自莫可禦但戒自足耳先生事迹六一碑悉今人莫不
知不復具仲尹之事有投杼之疑當闕之書院成仍令
守於僧母仍傾圮焉嘉靖辛卯歲仲夏賜進士第奉
訓大夫戶部員外郎懷寧後學天池方鵬撰

建三公堂記

三公堂者祀大師徐國公夢齡唐國公贊時周國公墉
也周為文正公之考而唐為王考徐為皇考云按祭法

有虞氏禘黃帝而郊嚳祖顓頊而宗堯夏迪殷周更立而不變三公堂所由始也粵若我世宗嗣位之初尊師重道稽古禮文首勅天下建啓聖祠於學宮上祀孔子父叔梁紇大哉聖人之制作炳越千古矣夫為子者居以王者之庭享以王者之祭為其父者曾不得妄以專祠薦以一牢豈人情乎禮曰天尊而不親然人思事之者以其有生物之功也况毓靈蒼際誕生玄聖與斯民立命者乎范乘載三公者或仕為節度判官或檢校少

府或掌管書記皆著有勞績以曾孫之貴追膺封典文
正功德弘茂獨盛當時而宋室湛恩汪濊報亦隆矣范
氏忠烈廟在吳縣德鄉讓原笏林之陽墟墓在焉而三
公祔諸寢室郡城義澤莊亦止及文正而三公故缺也
迨侍御史洛陽溫公如璋持節按吳周爰展視仁率義
起令於祠後創建三公之堂檄下郡丞茶陵龍公慶雲
經理其事亡何以瓜代去繼為董公堯封亦洛陽人也
至則亟覈祠工更議坊制矣先是邑司以時詘財殫頗

艱厥任適鉅家徐姓者誤扞憲網恥受汙名請以金贖
聽輸工所官第籍記之梓材既集匠作斯興驅運之勞
不擾於鄉呀呬之聲無驚於市地素窪塹城而平者肅
坻數級筵堂三楹峻而垣墉翼而廊序巍而綽楔飾以
丹堊圖以雲藻蛻飛革煌煌奕奕工若浩繁再期而
畢兩侍御之令迅於風霆丞一人之力神於不日矣三
公者肖像於中旁以將作監簿純佑許國忠宣公純仁
恭獻公資政學士純禮龍圖直學士純粹配焉濟美五

世裡祀一堂由是衣冠之賓虔奔式路來躋其堂為父
祖者詒謀是思為子孫者繩武是媿過其門者雖或細
流釋負弛擔徘徊顧瞻咨嗟歎息乃知憂樂之遺忠貞
之報百世不斬若此范公可為而人顧不為哉此觀風
者之績也司勳氏曰余觀茲堂之成而有感於大道之
公懿德之好矣夫闡崇先賢佑啓後人激世範俗非御
史不能仰承德意恪供厥職非有司不能上或宣令下
或急事有舉之而中廢者矣前人美意後人惡其不出

於已也將有其始而多不克終者矣堂之成亦幸而遇
其人雖文正功德之感人協恭同好而玄貺默啓其三
公在天之靈哉范氏乃更立主堂右以祀溫董及龍不
忘報德亦禮也為是舉者公十六世守祠孫縣學生以
益偕其兄主奉惟立請於當路移書太僕卿惟一祠部
郎惟丕從外交贊云落成之日告於巡撫都御史莆陽
林公潤公嘉樂之亦為捐金以畢餘工時兵憲為南皮
湯公賓郡守為廣平蔡公國熙郡丞為上虞金公柱涇

陽張公雲鸞浮梁吳公宗吉節推長沙龍公光吳邑令
漳浦魏公體明繼至者郡尉番禺招公夢賢孝豐吳公
維京長洲令新昌呂公若愚也敏以從事者蘇衛經歷
虞興舜長洲縣丞楊榮也並勤於石用戢恩私昭示來
裔隆慶二年戊辰春二月望日賜進士第奉政大夫
雲南按察僉事前吏刑工三部郎官國子五經博士長
洲皇甫汈撰 賜進士第前吏部文選清吏司員外郎
翰林院庶吉士太原王穀祥篆 蘇州府學生沈庭訓

謹書 提管世孫善耘 主計世孫惟新督鑄

重脩河南范文正公祠堂記

賜進士第文林郎河南府推官臨清周易譔
賜進士第中憲大夫山東按察使司副使
郡人劉贄書 賜進士第大中大夫浙江布
政使司左參政郡人劉衍祚篆

洛中舊有文正公祠其建置沿革誌悉之矣余戊辰登
第初授河南府理刑冬仲月朔蒞任越六日宿汴城公

署中夜分時夢戴幘頭著紅袍者來詣余詰守門者而問焉其吏應曰范文正公也余忽覺而異之己巳春西塘後峯二公祖枉駕寅賓館告余曰文正祠之欲脩久矣昔余輩未第時曾共董李村攜曹生滋蔡生承珮張生謳肄業於中往歲呈守道雲泉董公祖府中新所張公祖俱有捐特因循未舉也幸卒成之何如余一聞其言默然自驚曰前日之夢不偶哉文正公其諒余之可寄以興斯役也而來歟迺首捐俸金數星卜日飭材委

主簿董子鳩工而肯構焉其令尹復新鮑子雅有同志
亦捐俸補助之堂宇圯壞者隨即改築後起仰止亭俯
睇龍門遙瞻嵩少河山形勝畢收一覽之中祠遂煥然
一新矣祠前有井昔冲菴翁做秀才時所鑿以便一方
之用鄉民日食寒泉之利翁之陰德泯然無聞余復構
亭於上題其扁曰劉公井俾知享其利者知所自云工
俱告竣西塘後峯二公命余言記之余屏舊治門下知
二公之家世獨詳敢以不文辭乎竊惟士君子立身於

天地間其建功樹業當垂無疆之休故天之報施善人
奕世顯榮必有無窮之澤冲菴公振鐸平順雲巖公出
宰真定二公雖詘於下位其學問淵源行誼卓越素推
重於鄉評視文正公何媿焉故西塘後峯聯登甲第並
司樞要况二公之弟衍疇辛酉鶚薦慎庚午發解諸子
之在黌宮者蜚英馳譽詵詵然綿昌大之祚膺福祉之
慶者猶未艾也視忠宣兄弟之貴顯又何讓焉天人福
善之機余於二劉氏信之深矣鄉人升斯堂而登斯亭

者寧不感發而興起乎故茲舉也在二公謂之顯其親
在小民謂之樂其利在余謂之尚其賢固一時之盛事
也若文正之德業文章著在史冊者尤詳余奚容贅特
紀今日之事以見公之精神感召流行於宇宙者不朽
而祀之興廢恢弘顧有所待而然也故姑為之記云
隆慶五年辛未孟春吉日立石

重修文正書院記

賜進士通議大夫南京太常寺卿前禮科給

事中山東提學副使太僕寺少卿南京鴻臚
太僕光祿三寺卿奏准致仕奉詔進階正議
大夫資治尹長洲袁洪愈謹譔 鄉後學陳
爾見謹書并篆額

文正公祠故義宅也范氏自唐以來世居此矣公既置
義田義莊以贍其族之人又葺故居而拓之以出納其
莊之所收以居族之無家者名曰義宅推先世之德詒
永久之謀焉子孫嗣守不廢雖中更散亂遺澤依然咸

淳間潛說友守平江以公德業之盛宜百世祀請建專祠於宅之東至正間守吳秉彝奏改為書院迨我皇朝開大明神大化勸學脩禮崇古上賢以風四方祀典既定又即書院為祠而公私時祭子孫會食因以為常祠久不無頽敝則葺葺者凡幾而壯麗為難今皇上萬厯二年御史餘姚邵公選自館閣代巡江南所至咨諏政務攸先民何以格心俗何以返古謁公祠下慨焉廟貌之弗稱無以樹之風聲若痼癰厥躬乃謀之藩臬檄

郡庀工一大脩治資以罰鍰郡守成安吳公承休蒞事
命吳邑魏丞正參董厥工經始迄落成凡五閱月先是
御史溫公如璋按吳議建三太師堂於公祠之北樹緯
楔於祠南溫公復命奉行者急於苟完地未堅平材多
痛瘠無幾何時艤隄陟剝黝昧弗莊羣情靡寧至是重
檻巨棟高扉邃龕神靈攸妥罔不尊嚴前後堂宇門廡
周垣暨茨丹雘罔不精整徹舊而增新則坊石堅貞宮
牆赫奕建先憂閣於祠左與歲寒堂對峙蒼白相準神

氣固完不煩府庫不疲民力而績效倍常矣三年七月
癸卯御史率司屬陳牲虔祀告於祠文辭深厚燦如也
洪愈密邇公祠樂聞盛典秉誠晨詣佇公之門怡然高
望而遠志焉拜公之像黯然沈思而內愧焉作而歎曰
嗟乎自古傑士名流豈少哉當時則榮沒則已焉偉烈
休聲震耀千古直與泰伯子游相等埒惟公一人而已
豈非禮義之宗盟道學之師範邪蓋嘗以先憂後樂揣
公之心公何好憂而惡樂如此哉伊尹曰子弗克俾厥

后惟堯舜其心愧恥若撻於市一夫不獲時予之辜夫
曰愧恥曰予辜其能勿憂乎公之心事固如此或以公
當盛世而常不忘憂此不知公者也世必時雍迓衡然
後可以言盛真仁時可遽許乎即公所為不合於時者
皆不得已也公所見惟理所存惟理所言所行惟理公
故不得大用於時然當時君臣固已愧悔恨惜矣後人
之思慕景仰而崇奉久且益篤豈不以理根於心其天
有不死者乎吾儕讀聖賢書餐君之粟藉慶於前人而

樂利憂窮憊然於理者皆公之罪人也公嘗有言吾儒
之職舍先王之經則茫乎無從矣奚暇學人之巧失其
故步但惟精惟一死生以之此公之學術生乎所以自
立也學不通經無以致用而立志者學之基也讀書刻
厲數年長山數年學舍不解衣不嘗肉不窺寶藏不觀
法駕大通六經而後出而有為學者之志能有如公者
乎希賢在我可以深省矣夫善治者繩人以法不若化
人以道喻人以言不若感人以心執樞要揚芳風因人

心之自然而鼓舞之不待戶說以眇論而天下化此知
治之本者也邵公此舉得之矣時藩參臨川舒公督儲
憲副永嘉王公飭兵協心同德樂觀厥成吳公奉職循
理治平稱最夙辦於此無難也魏丞雅敬先賢奉公竣
事亦可嘉矣文正公十六世孫太僕卿惟一念祖紹烈
創謨傑構主奉御醫惟立守祠庠生以益十七世孫鄉
進士允謙皆殫慮藏材共底厥績不可以弗識也邵公
名陞舒公名化王公名叔杲吳公名善言皆以進士高

第為聖朝名臣亦一時之隆際也洪愈淺聞不能究宣
受命吳公辭之弗獲謹書此以為記

又

賜進士出身中憲大夫浙江提學副使文正
十六世孫惟一謹撰

先文正公在當時凡宦遊所至各有祠而吳為公鄉郡
宋咸淳甲戌潛公說友守郡請於朝即公義宅之左建
祠祀公而撥田以供祀事至正丙戌郡守吳公秉彝以

書院易祠額而承務郎李祁記之大都謂公功被當年
澤流後世未易殫舉惟是首請天下郡縣建學捐已地
建郡學授橫渠中庸延安定太學有功名教啓宋道學
之源蓋祖紫陽之論云入我明宣德甲寅郡守况公鍾
成化丙戌巡撫劉公孜辛丑巡按劉公魁先後葺脩之
歲久漸圯且祠南岸地昂林木聳鬱堪輿家每言祠庫
不稱法宜加崇以昌後胤嘉靖甲子侍御洛陽溫公如
璋按吳是年冬惟一以浙臬使入覲謁公郡臺言之公

忻然諾行郡於祠後築坻數級建三公堂五楹祠公皇
考徐國王考唐國考周國視公祠特峻起以應堪輿家
之言而郡丞龍君慶雲經理其事請以公四子將作監
簿純佑許國忠宣公純仁資政殿學士恭獻公純禮龍
圖閣學士純粹配享左右皆所謂禮以義起者也己董
公堯封代按至與溫公同邑合志復樹綽楔於祠前題
曰世濟忠貞丹堊赫奕益增舊觀矣方三公堂之初議
建也今兵憲永嘉王公叔杲時以海虞令治行高被召

未行溫院檄公覈之公議工直若干會吳尹秦君崢議與公不合故縮其直以苟完塞命堂既崇敞而梓材不勝任以故不三四年堂且就傾惟一與諸宗人方憂皇之顧計未能舉也今侍御餘姚邵公陞奉天子命代巡江南謁公祠而歎曰子責哉迺謀諸糧道大參舒公化兵憲王公郡守吳公善言委吳邑丞魏正參督脩之自祠徂堂自門及廡工材並飭堂加四壁鞏以陶埴轉傾為堅易故以新先年武功伯徐公有貞所題祠左右文

正義澤二坊亦咸整治采繪炳然又於祠左建先憂閣
三楹森出雲漢之上祠前臨河圍以石闌南岸列之照
屏以障林木蓋自有祠以來歷四五百年而祠之制乃
大備於今日魏丞祇命恒宿祠中兩道暨郡侯時程省
之工凡四閱月而竣直取贖金工從傭役廛市無驚氓
黎不擾侍御之威令道府之襄勞豈非交相贊者哉七
月癸卯侍御自製文祭文正公以告成事畧曰陞也踐
公之鄉景公懿軌新公之祠敬陳奠饋期與百僚準公

為標各脩職業以翊聖朝嗟乎侍御固抱先憂之志與
文正曠世而相感者哉乃惟一讀是文不覺感而泣下
因對宗人諸長老言惟一向列士林回翔且久無所建
立竟免以歸慚負先憂之訓多矣今侍御功德我范甚
大當為立主與潛况溫董諸公並祀祠中以無忘報德
且以詔後之子孫庶幾聞而興起不致如惟一之徒貽
悔於噬臍也諸長老曰是是因命叙記以鏡於石

祭范文正公文

賜進士第巡按直隸監察御史邵陞撰

范公之祠於吳蓋四百餘禩矣今萬厯三年乙亥餘姚邵陞以監察御史代天子按吳中得拜公祠而見其有頽圯者謀諸參政舒化副使王叔杲知府吳善言等亟命工葺之事竣乃詠得七月七日癸卯寅率司屬以清酌少牢之奠而昭祭於公之神位曰昔聞在宋多賢大臣厥賢伊何公其一人於惟范公秉道踔卓天下自任先憂後樂始居校理風裁獨特蘇州再徙越有名師四

論迂時三臣坐竄為國當然於公奚憾延中失守忼慷
巡行纍纍羌漢公有其城經略中原軍雄一范富哉曾
中真時宰相天章十事咸仰薇猷台星弗耀遂隕徐州
於惟范公學本忠孝誠信所孚焉往不造矜賢嘉善士
多及門義田之創族有餘恩公雖兼才若無能耳公位
不盡公德至矣公之存也屢擯殊方朋黨之議抑而彌
揚公之沒也碧駮狂訕白壁之輝久而無間遺範孔嚴
廟食萬年以專奉公法有合焉陞也踐公之鄉高山伊

通懿軌矚然於今猶古顧斯簡命期我百僚盡法於公
以翊聖朝棟宇重新拜公廡下先於蒸嘗陞其奠者一
以自罄仰止之私一以相勗儀刑在茲時代有遷祀公
無數尚使雲仍沾其世澤南睇遺封迢迢洛陽靈其不
爽來乎故鄉尚饗 鄉後學周天球謹書

重脩文正書院記

賜進士資政大夫太子少保禮部尚書兼翰林院學士予告三賜存問華亭陸樹聲撰

時年

九十
六

皇明任子中憲大夫知漢陽府華亭

孫克弘書并篆

萬曆甲辰御史馬君奉命按視吳中興賢軌俗率先風
化乃首謁范文正公先生於故祠仰視櫟棟旁周門廡
咸摧圯不治乃喟然慨歎與郡守李侯謀所以新公祠
者於是陶甓度材不半期而告成公十七代孫主奉太
學生允觀十八代孫諸生必溶率族之子姓再拜徵予
文為記用副御史馬君表章先賢鉅典予惟公事蹟載

在宋史若歐陽公神道碑考亭名臣錄不啻詳矣予耄
謝筆研久則烏能記公獨念公少而孤貧塊處一室饘
粥不贍進士釋褐鬻馬徒步而歸及為執政焚黃姑蘇
僅糝庫絹以散親戚閭里知舊小有俸餘捐置義田南
園數畝地又推之以建郡學度公平生殆未嘗享有一
日士大夫之奉者夫同一吳耳當時士大夫良田美宅
與其人轉盼俱盡即其人亡其姓名存誰復為之禮一
瓣香薦一杯水者而公之祠至今獨存百世而後御史

又相與撤蠹而更新之則士大夫不當以此易彼明矣
公為將相時邠慶二州之民與屬羌皆畫像生祠祀公
及卒羌酋數百哭如父齋三日而去祠滿海內一祠又
何足為公重輕特以吳故鄉父老丘隴所在子孫旅食
於義田者歌哭祠下公其賁然而來思乎未可知也吳
中祀典最著者泰伯子游暨公而三公遜田贍族舍宅
建學有泰伯之心以春秋授孫明復以中庸授張橫渠
又延胡安定入太學為諸生師濬發道脈於濂洛關陝

之前其功又與子游學道相表裏豈若鄉先生沒而祭於社者等乎御史特新公祠蓋推本公為宋儒理學淵源之祖使吳人以公重吳俗亦以公厚凡士大夫有意收恤其族人而加禮於學校者過公之祠或尚有興趣焉是不可以無記御史名從聘靈壽人郡侯名右諫豐城人並己丑進士而贊成其事者公十七代孫乙未進士今滇中學憲允臨也例得附書萬曆甲辰八月吉立

金山建范文正公祠記

賜進士出身文林郎知常熟縣事長水譚昌
言撰文 十七世孫允臨篆并書

嘗稽往牘若越王之念蠡文公之念子推伍子胥之念
江上文人彼非有血脈淵源之派則銜德慕義精相注
而神相馳也以今睹於揮使范公允夫念其先祖文正
公於數百年之後乃首倡議而創祠以祀此其精神所
嚮往至深遠已古今人豈不相及哉公之肩子揮使君
必忠以治兵與余共事海虞恂恂惟謹且誠不敢自戾

於度以速官謗以辱我先文正以負家大人之明訓迺
從容述尊君揮使公祠文正之始末而祈余記蓋公文
正公十七代孫國朝有高祖廷玉以吳縣廩生教諭密
雲故於官次子天祐獲軍功擢指揮同知世官永清左
衛迄天順己卯始調金山金山去蘇郡三百里而遷文
正祠堂向建於蘇郡學宮左羣族之子弟崇祠之至今
獨公以道阻故每不得展謁奉蒸嘗心實惻然曰報本
反始自昔重之高山仰止情何能已遂具專祠之議請

於當路當路以為可於是度廣基聚材鳩工始於癸卯
歲孟秋成於甲辰年季夏廣雷延蔭衡闌擁衛堂宇翔
矯牖戶通潔翼翼然寢廟聿新矣事既竣公率其子暨
族人拜而祭焉海濱之人圍集而觀焉斯時也念先憂
後樂之懷則恢狹小為廣大可以勸志念青天白日之
心則變闇沕為光明可以勸德念破膽寒心之頌則振
聳懦為威武可以勸忠章縫念之而檢不渝編昨念之
而樸不鑿萃渙合離移風易俗厚之道也教之始也豈

直脩祀禮伸孝思云哉嗟乎維水有源其流斯遠維木
有本其枝斯蕃乃所以培植而疏濬之者人也周公肇
封東魯一以親親為亟遄遄追念文王且上而追念后
稷無忘本始以故開業傳世侯封千載視他國獨縣長
不已輓近士大夫紆朱懷金勢雄閭里以輿馬宅第相
矜耀而尊祖敬宗周黨睦族之禮闕焉弗講以希保世
滋大庸可冀乎若公者篤水木之忱敦親愛之誼迹邁
流俗躬持古道其為子孫衍餘慶可知也固樂為之記

俾勒於石以俟後之人有所鏡而念焉萬厯三十二年

六月日

重修許墅文正書院記

馮夢禎撰

宋范文正公學術則為純儒立朝事業則為純臣垂範
子孫則為賢祖宗而師表百世則為殊絕人物公故吳
人也少遭閔凶流移轉徙以致顯達故京雒齊魯間皆
有公名迹既貴復歸吳故公廟祀遍於南北吳中尤盛

公之一言一行遺風餘烈無論士大夫爭為傳述即婦人女子具能言之故其廟祀所在即至衰歇化為荒烟野火而士大夫好古嗜義者輒能飾而新之以樹世教蓋不獨愛人思樹秉彝好德之心不可泯沒而公之風烈精神實有以鼓之矣公嘗讀書濟南之長白山中其卧起游歷處至今遺踪彷彿可睹民部郎權關王公者濟南之新城人也少嘗挈子弟讀書其處稟仰風流追玩遺跡依依不能釋去既貴宦游又得蒞公之里其於

公似有夙緣以故樂新公祠許墅隔水廣福菴之左故
有文正公祠王公初至脩謁見其堂宇頽然階下雜沓
心動而未敢言會學使范長倩相見語及祠之所以頽
紊狀詞色慘然而以重脩為託王公唯唯其明年乙巳
乃偕承祀范生允恒按行其處則知為守祠宗人彥倫
者挈其內姻沈某同居沈又挈其姻黨擅造私房橫塞
神路其他匹居羣處者尚纍纍也王公繩以三尺逐之
他徙選耆民二董役始新正堂添造兩廡繪公遺跡又

添儀門以分內外杜塞旁竇外為大門門左右以居奉香火者餘俱嚴禁凡以工計者若干為費若干祠既成當樹之碑以識成功詔不朽而范生允恒者故嘗與余有筆硯之舊乃令為介以記請夫古之君子先成民而後致力於神以余所聞王公初至念近歲取民無藝所征科額外例溢加一亟令損之及額而止闕南蘇松杭嘉湖五郡興販小商船叩關者向入科稅今一切蠲除商民咸德之積有羨餘以待公用報之兩臺使者不入

私橐蓋王公之所以成民者至矣而後斥其餘力以飾先賢祠宇合萬姓之驩以申馨香之薦文正公在天之靈寧不亟享之故吾謂惟有王公之稱職而其崇祀先賢為可稱也若其職業之隳棄民力之不存私橐之是營而欲以媚神瀆祀託先賢以文其短神之聰明正直寧不吐之何以稱焉又嘗論之君子之澤及子孫者雖至遠不過五世十世而其風之被於天下及後世者每至於無窮即如文正之祠祀之毀之乃其典香火之子

孫而脩復飭新者則風馬牛不相及之齊魯縉紳也是故君子之脩身善世亦慎所以風之者而已至以先祠為急白之當道以綿其世澤如長倩學使及允恒者亦范氏之賢子孫也因並記之若長白山祠堂則今少師申相國記之其文高古典則足光盛舉又遠非鄙陋所及姑以承王公雅意云爾

欽定四庫全書

欽定四庫全書
卷四

范文正集補編卷四

欽定四庫全書

范文正集補編卷五

碑記

新建河南范文正公祠記

賜進士第知洛陽縣事太原古交武攀龍撰
宋魏國范文正公葬伊闕萬安山下其子忠宣公置祭
田八百畝熙寧開創褒賢顯忠寺以奉香火然而祀事
未備也自元守臣郭文鼎始請舉祀遂循為常典云厥

後修祠墓禁牧樵者代不乏人而兵革相尋荒頽日甚求其故蹟胥委之寒烟蕪草之間余既建程夫子之祠於中邵先生之祠於左復闢西偏之地為公之祠堂使天下知公之忠義在朝廷勲猷在竹帛世濟厥美在累朝而祀事孔明在萬禩也祠既成長平同年龐子太樸適過余顧謂余曰公之建茲三祠也其以表宋之大儒與宋之名臣也固矣第四人者時地既不同出處亦各異胡鼎峙而為三胡珠聯而若一其有意為之耶抑無

心合之耶豈非道德事功可一以貫之耶亦豈繼往開
來高譚名理之人出將入相固不難耶又豈非先憂後
樂慨然以天下為己任者其於聖學淵源顧未嘗無所
得耶噫是其作祠之意寧無是耶余俛而笑抵掌而應
曰有是哉相與酌酒祠側舉而記之石上時順治八年
六月吉日 縣丞傅夢祖 督工鄉約曹俊傑

重脩先文正魏國公墓道饗堂碑記

先文正宋太師魏國公薨於徐從母氏謝太夫人兆葬

於洛陽萬安山并其子監簿公純佑忠宣公純仁恭獻
公純禮龍圖學士公純粹以下三世皆附焉公做秀才
時即以天下為己任大通六經之旨文章必本於仁義
先天下之憂而憂後天下之樂而樂以名世之才致位
將相正色立朝亟意尊主庇民歷官過化靡不繪像立
祠故有泰山北斗景星鳳皇之詔第一流人物之稱世
濟忠直有功名教因與天下之名山大川前代之聖帝
明王並登祀典每歲上已有司奉中牢祇祭及世代沿

革子孫散處望白雲而仰止芳草萋萋至大中八年世孫國雋履其中得同知徐公景儒為復侵地至正七年國俊從弟文英命其子廷方致命李君公平時分憲於洛率所屬奉牲帛致祭服豪猾以歸化而復徐君所封之故土繚以周垣樹以松楸又築室六楹俾趙氏隣民廬其上以守熙寧間創褒賢顯忠寺為立香火正統戊午都御史陳公鑑訪公墓於郡守袁公鉉按褒賢寺碑求其規制遺規偕十三世孫曹縣令希正會祭葺脩既

而憲副尹公禮按部率官僚奠拜墓下新其牆垣饗堂
立門植柏令洛人一戶免徭役守之成化乙未十三世
孫從規詣都憲洛陽畢公移檄河南都憲張公下令正
其塋域禁其樵牧而一時大參孫公伯少參蔡公克存
副憲王公廷秀僉憲馮公景陽協力從脩盱江何喬書
其事兼製迎饗送神之歌遺子孫以侑牲醪弘治四年
都御史徐公恪巡撫茲土慨然太息而藩臬守令封築
一新第文章事業炳後世之景行故誦詩讀書勤千秋

之向慕惟是一坏之土無嫡裔守丘每致斧斤芻牧相
尋不無水源木本之痛審處其間乃復蒙公遺文召取
吳中後裔迨明季鹿奔潢池弄警石麟卧於宿莽松韻
泣乎秋風

大清定鼎詔凡古昔帝王先聖前賢忠臣祠墓毋得毀
棄適余姪承祖特奉簡書分巡河洛未幾余姪承祖復
膺寵命出鎮兩河掃墓登山殷思先祧時余掌事秘書
院輟政居家調苓煎朮念先人體魄弓履瘞藏之地乃

走書千里督諭兩比兒曰汝謂承祖承宗矣顧名思義其亦何居伊洛瀍澗之濱祖宗之宅兆在焉荆榛草蕪得無芟與牛羊樵牧得無禁與斷橋破壁得毋飭與供祭土田得毋清與守丘支庶得毋盼與於是乎革明堂之隘陋祛斷水之湫汙擴大厦而就濃陰開繚垣而成直道添設耳廡昂軒星門甃兩岸以駕虹墾荒烟而培樹更買六尺之花蹄給八家之藁薛命勤於耜庸潔蘋繁遙望蒼雲鬱嶺明月印溪依希夜雨青山矣而分府

大參朱公衣助河南太守甯公之鳳汝州刺史秦公耀
名洛陽令葉公琪各捐金助役謀建華表擎天石柱以
公無忝於雙槐華表標題明德允馨於百世亦既賁泉
局之光而錫雲仍之福矣家書報竣喜溢滋惶切余不
肖叨承顧命參政中書未克繼先憂後樂之遺志實自
愧出將入相之家聲乘六龍以御天慢謂經綸天下躋
三公而婉位甘齋粥之餘休惟敦睦宗支彌縫衮職罔
敢渝越為家法羞或亦山靈之所鑒而宗祊之所格也

極睇牛眠蒨蔥松柏曷勝焄蒿之想至其經濟文行俱
載文忠公勒石非所敢及惟記萬安山先後脩葺之由
以示子若孫世守之而并誌諸君子之懿好如斯云順
治十有三年歲次丙申吉旦內院掌內翰林祕書院事
纂脩大總裁太傅兼太子太師許陳國家重務大學士
潘陽後裔文程頓首撰文

欽差整飭河南等處分巡兵備道按察司僉事陞山東
布政司分守東兗兵備道左參議後裔承祖薰沐書丹

欽差經理河南等處軍務鎮守河南開封歸德三府等處地方總兵官都督府都督僉事後裔承宗薰沐篆額

重建天平山忠烈廟前堂及儀門記

徵仕郎翰林院檢討充纂脩明史官文正公十八世孫文正書院主奉必英敬撰

康熙二十有四年孟夏賜山忠烈廟前堂及儀門告成蓋庀材鳩工已六年所甚矣茲堂與門之成之難也粵自慶陽廟貌移建於天平之麓宋宣和迄今將六百載

考之家乘重建者再矣其始也在元始祖之二十二年
主斯役者為主奉諱邦瑞提管諱士貴而司計諱邦翰
宗遜等佐之土木丹漆之費咸取具於義學餘粟廟成
而前朝奉大夫牟公嘯為之記經營者固勞矣未聞其
難也其繼也在明英宗正統之八年是時巡撫侍郎為
廬陵周公忱巡按御史為壽昌劉公甄武昌劉公仕昌
錢塘鄭公顯知府為李公從智以及隣封之長四方之
人先後伙助且責成於吳縣知縣葉公錫閱三載而廟

成而吏部尚書王公直為之記斯役也出於衆力尤知其非難也夫前者值元代輕賦之時義學方興舉不墜後者又當明盛時宦茲土者崇重儒先百廢具舉宜乎其廟之易成也今則義學久廢安從取粟異代賜廟亦何關於國事況乎空山遠道車騎罕有至焉則茲一堂一門之成也不較難於前人哉必英自十年前主祠事時郡城書院門燬於火且為守祠者斥賣幾盡浙江巡撫忠貞公諱承謨者蠲金贖之復為修整其什之五書

院廡具規模後英繫官京師山祠復告將厭焉於是以義田贍族之粟委之提管可詢主計彌隆安上及子能洪能濬等令其鈎校畸贏積索錙銖次第興工猶苦不足逮英請急歸里為會計稔知其難復令監簿房世孫興巖監收新租以充其費先後五載凡以粟易值得白金五百有奇遂撤前堂而新之惟石柱仍其舊較前為樸壯又以形家言移儀門於石橋之南建為五楹以兩夾室麻舊碑而池北周以石欄子孫瞻拜之地尤宏敞

為費復百餘金許是雖一堂與門其成之之難如此烏
可以不記乎或曰記當及於廟之成是舉不已遽乎英
應之曰五年間義田再遭凶荒子孫共蠲升斗以襄厥
成且董之者興巖勞苦為多尤不可沒也若夫竭其心
力以竣厥工實英之責他日廟成自有當代名公鉅卿
豐碑深刻如年王二公者英也何足言記乎惟是後人
之觀斯堂者勿視為元明兩代之易而忘今日經營之
苦是則英之志也夫

賜山舊葬文正公高祖麗水府君曾祖考徐國公祖
考唐國公考周國公及孫子儀公并諸子姓有功義
莊者其墓道歲久漸淪於莽因令興巖培土立石以
識之會與廟工同時並舉附勒於此乙丑夏四月必
英再記

文正書院世德源流碑記

康熙甲戌之春承勲以滇黔制使
召為御史大夫未幾改制兩江

特敕馳郵之鎮其秋泚止金陵即奉

命與浙江會視震澤暨吳淞水利孟冬來吳公務既竣
乃展謁在城先祠及省視諸墓道族之父老子孫長幼
畢集獻酬飲畢僉以修祠請承勲作而言曰是固先文
肅公之志而仲兄忠貞公未竟之事也微父老言固將
竭蹶以從今又以為請敢不敬諾謹按譜牒我遼瀋一
支出自忠宣公子子儀公諱正國累官荆湖漕運使宋
末扈從隆祐太后至江西卜居臨川三傳至恂儒公諱

良儻者仕為迪功郎自臨川遷樂平因世為樂平人恂
儒公傳六世至景申公諱岳者明洪武時以通經授雲
夢縣丞失火延焚卷籍謫戍遼東瀋陽中衛後所建文
初遇赦還家子匡十七公諱孝文者留瀋陽匡十七公
三傳而至瀋溪公諱總者登正德丁未進士至兵部尚
書瀋溪公又三傳而至我父先文肅公諱文程官至內
秘書院大學士溯厥源流則文肅公為文正公十九世
孫而實忠宣房之嫡裔也先是瀋溪公筮仕水部筦權

武林始得詳樂平謫戍本末後乃建大司馬坊於其邑
示不忘本云至先文肅公又得詳姑蘇至江西原委自
是水木本源洞然明白順治年予告後擬請

命南歸謁祠上冢初志未遂諄諄以屬承勲兄弟而仲
兄忠貞公隨撫越制閩凡三過吳門必展祭先祠見其
摧圯幾盡祖像不蔽風雨亟捐貲度材陶甃鳩工改作
先葺正寢以恪其典禮嗣葺三公堂以安三太師之神
鼎新歲寒堂俾子孫報享有所復建先憂閣於祠之左

門廡垣牆方欲一切興舉而逆藩告變公遂殉節海疆於是乎遺其責於後人嗟夫非承勲之任而誰任哉然又不敢先私而後公以故甫履任即出俸緡倡脩

聖宮之在省會者工既成乃從事於家祠遵忠貞公之規畫而加苾焉世濟忠直及文正義澤之坊一郡之觀瞻也工最急宜首河以南大垣一祠之屏蔽也工亦亟宜次然後建後樂樓於祠之右與先憂閣並峙稱雄工又次之又於巽地廢基特創新祠以奉文肅公主而以

先兄忠貞公從祀焉工又次之忠宣公舊有官祭特祠
鞠為茂草春秋權祀於先憂閣下心竊恫焉乃重葺舊
諸賢祠改為忠宣公祠以為專祠地而以文肅公舊祠
改為諸賢祠以報先賢之有功於義莊者復於東南隅
建祠以祀土地之神而明裡於是乎咸秩矣歲寒堂饗
亭廢久陪祀子孫曝日承雷無所庇乃復建立如其舊
又作門加局鑰焉於是乎旅進趨蹌而不失其度矣至
於四隅隙地有鬻於他姓者盡償其直而還諸莊於是

乎經界正而侵牟無所容矣凡此固承勲之所以述忠貞之事而皆所以繼文肅公之志者也夫以我文正公之德澤而又承以忠宣公之忠孝父子事業照耀天壤似難乎其為子若孫矣今其苗裔散處四方者多有唯我遼瀋當有明中葉風會未開乃篤生我瀋溪公其歷官立朝樹績不朽相傳有洛陽水月及范青天之謠士民謳思至今又數傳而及我文肅公為開國翊運功臣凡此皆祖宗積累深厚是以代有偉人應昌期而挺出

為宇宙扶綱常植名教非特一家之俊傑也今承勲待
罪茲土不能於祖功宗德有加憂髮而但淵冰自慄上
報

皇上眷顧寄托之深恩下副祖宗父兄期望責難之厚
意故於祭告時矢諸几筵之前苟玷宗風有如皦日唯
欲令後人指而目之曰此真不愧清白吏子孫者也他
何求焉癸酉之冬承勲自滇來

朝奏對留浹月辭還

皇上親灑奎章

賜臣承勲四字曰世濟其美乙亥之歲閩撫臣請特祀
臣兄於閩

皇上宸翰重褒

賜臣承謨四字曰忠貞炳日凡此皆萬世難遇之恩榮
而可為祖宗光寵者也祇勒

御額恭揭祠楣以昭示子孫於勿替云後之觀者步范
家之園撫十圍之樹俯仰今古前人之流風餘韻有宛

然如在者乎儻由此醞釀栽培元氣愈固則根本愈深而暢茂條達自不期然而然矣安知不又篤生偉人如上數公乎所望我後之感發而興起者無窮也工始於乙亥七月以丙子五月落成謹識其實於麗牲之石如右所云勦其事者則有文正十九世孫監簿房孫主奉能濬例得附書康熙歲在丙子夏五月吉日總督江南江西等處地方軍務兼理糧餉操江兵部尚書兼都察院右都御史加三級文正二十世忠宣房孫承勲拜手

謹記兼書

文正書院世德源流碑陰記

祠始建於宋咸淳甲戌蓋四百二十餘年於茲矣其中
堂寢廊廡樓閣垣屏坊亭綽楫之屬則皆賴當時諸賢
卿大夫泣茲土者相繼葺脩日有以益其闕至嘉靖間
凡歷三百餘年而其制始備其成之難如此然規度既
宏繕完不繼百餘年來日即於圯已酉之歲瀋陽相國
文肅公中子忠貞公撫浙道吳謁祠下慨然興水木之

感乃為捐俸以營之庀材鳩工什居六七未幾而公以制閩殉節遂弗克漬於成又越二十餘年而今制府駐節兩江始得以竣其事凡而祀飲寢食教肄庖湑之所無不畢具前後所費不下數千緡而祠之制復備於今其成之難又如此昔文正公置義莊立義學以教養羣族而監簿忠宣右丞侍郎諸公為之詳明規式指揮盡善請於朝而勒之堅砭俾子孫世守至今不廢今制府紹文肅之志續忠貞之業父子弟昆殫心祖澤篤成烈

而行餘慶何其盛也此世德源流制府述之詳矣竊念先大父少參公當義澤中落為割膏腴田十頃助入之以供脩祠贍族之費蓋文正公當日義田至有明中葉僅存三之一田故最下而又困於賦不足以支而貧族仰給者且數千百指實藉是而少沾升斗之惠也暨先父檢討公早歲登賢書即以清理義田為已任前後四十餘年間凡三主祠事興復舉廢脩定規矩凡族之貧且老者廢而處者喪而無以為葬者子弟之能讀書者

必加意優恤嘉矜激勸無不曲至先是天平山有忠烈
祖廟建於宋紹興中於吳中祠為最先歲久頽廢益甚
乃倡勸子孫共捐義米更為斥其制而新之今閉閤階
序嚴整合度皆先君子之力也當忠貞公之修復先祠
也先君子實經理之既以未竟厥工為憂而今制府方
開府粵西旋擢制滇黔乃萬里家書往復惟以修祠相
屬今制府能踐其言而先君子已不獲覩其成亦可悲
已能濬濫主祠事得挂名碑尾藉以不朽敢為序而綴

之以誌德於不忘且以諭吾族之父老子弟共相維持
思所以善其後則尤能濬之所厚望也已康熙丙子八
月文正書院主奉文正十九世監簿房孫能濬拜手謹
記

重建許墅文正書院記

先文正公祠宇遍海內而吳中為公鄉邦得奉朝旨建
專祠立書院載入國家祀典者尤非一所許墅閔武丘
鄉文正書院其一也祠始建於明嘉靖中懷寧方公鵬

以戶部員外郎來權闕設義塾敦教化揭祀公以示諸
生典型即古鄉先生沒而祭於社之義詳華鎬義學記
與陳大咸諸賢祠記中又於廣福菴之左特建書院以
奉公祀每歲春秋部使者具牲牢謁祠下祭典具編闕
志其來久矣先是彭華鄉官署傍故有祠相傳公嘗降
靈為土人舊祀既廢而方公乃建於此其後分司張公
立愛葺修之而榜其門繼為族人佔居毀頓既而戶部
王公之都與先大夫參議公同年相友善屬之興復馮

夢禎為之記世孫守祠生可維復增建三太師祠規制
畧備

興朝以來二十餘年又盡頽廢許野為南北莊廬名賢
往來輻輳前賢建祠祀公風厲來學立意深遠顧以去
郡三十里而遙子孫又復散處其平日之繕完灑掃責
在奉祀之人守祠者賢否不等既居其中不一再傳遂
有視同私產分析授受姻黨雜處甚或僦居取直聽其
傾圮而不惜祠之廢壞大率由此康熙癸丑瀋陽族孫

忠貞公承謨制閩來吳既捐資修建城莊書院及郡學
祠時許闕僅存儀門一椽以棲神主庠逼破露不堪屬
目會主事陳公於忠貞為年家子先君子檢討公因乞
其一言為勸遂得倡助市木五十緡未幾陳公瓜代去
而海疆不靖忠貞殉節工弗克舉祠木久貯河干復為
族人廢去族孫生員安度與子君揆相繼為義莊提管
矢志興建提學贊善許公督閩馬公巡撫宋公咸分清
俸以助其役於是首申理所售之木為賈若干繼請撤

郡庠舊祠五楹得木瓦之材若干積諸當事及族人所助金若干不足益之以義莊所存舊租餘粟若干經始於壬申之夏至壬午秋乃成中建文正公祠旁兩夾室左崇德報功祠右衣德象賢祠後三太師祠舊祇一室今規而廣之一如前堂之制以及大門儀門凡若干楹周垣照屏廣袤共計若干丈若干尺門序正位輪奐堅壯遠過於昔蓋工力艱鉅時會需累三十年而始克告竣實為關中賢祠之冠龍在旃蒙

天子南巡至吳

特賜文正公祠

御書扁額因摹奉各祠擇吉懸掛於時子姓咸集奉祀
生安炎歷叙前此廢興之始末而屬濬記之濬忝主祠
事義不獲辭竊念書院之成皆賴當世賢公卿大夫優
崇替襄之力而尤念先君子與安度提管實始其事今
君揆善能繼述經理督治以迄於成其功未可泯也因
括其大畧而書之石自茲以往尤願闕居附近子孫交

相保護毋使隳廢復蹈前轍濬之志也陳公名常夏陝西富平人遷蘇州郡守許公名汝霖浙江海寧人歷官禮部侍郎馬公名逸姿陝西武功人今任蘇松糧儲道參議宋公名犛河南商丘人今任江南巡撫皆以治行著聲於吳士民食德而在吾族之生祠而尸祝者尤不容已此崇德報功之祠所由立也謹竝識其名以著不朽云康熙四十有四年乙酉仲秋穀旦文正十九世孫主奉能濬拜手謹記并篆額二十世孫興禾書丹

重建支硎山文正公祠記

支硎山觀音寺者天平白雲功德寺子院也宋制凡大臣瑩所恩許置寺度僧追福祖先先文正公葬河南哲宗朝勅置功德寺以舊法會院改賜額褒賢顯忠禪院以奉香火今公祠及仁宗御篆墓碑俱在寺中而蘇州天平山白雲寺則公參知政事時以高曾祖考四世松楸所在藉此寺照管隄先降條貫奏賜今額為功德寺間歲聽度一僧以嚴崇奉至公仲子忠宣公登相位乞

兩處遇節各添剃度行者每歲一名申尚書省禮部施行蓋前代優恤大臣以繇孝思於不置恩意周渥此功德香火院之所自來也先是勅建忠烈廟在白雲寺之右明正德中知吳縣事劉公恒以寺本為公奏請而祠反在旁於義弗稱乃於寺中復建堂祀公名曰正本俾守於僧欲其不忘厥主焉後寺經兵燬而正本堂亦廢支硯為天平支隴兩山聯亘相望明初歸併天下寺觀其屬於白雲者凡六而支硯之觀音寺與焉遂為功德

寺子院信施所入分供白雲常住率以為常寺中亦崇祀公以為山主故皆為范氏香火院祠歲久圯不治神主移供僧舍與釋像列坐族姓聚處山下者不下數十家歲時瞻拜無所蓋兩寺香火僅有空名久矣先君子檢討公主奉祠事振興衰緒謀重建祠以存香火壬申秋以謝世不果濬仰承先志與掌莊執事房長彌隆彌勲彌熹興平興似興俊君訥君揆儀則儀秩等分董其役材用一取於義莊儲粟不以纖悉累僧人重建文正

公祠三楹像璫如忠烈廟製外為大門堂階欄楯櫺堅如度自相基會作凡閱八載而卒事祠門南向憑高面山蒼翠異狀遠而村墟藂落樹陰曖曖遊客復與隱見絕續者皆出於几席之下以歲之春秋躬率子孫至祠下修報祀之禮凡族人借端侵擾常住者依祖規欺詐白雲功德寺例有罰復上請於學院批藁奉祀生一人以司兩山祠廟奔走豆籩之職而香火院始克復其舊以落成之明年

皇上南巡駐蹕蘇州念先公為宗室名臣

特賜

親書濟時良相扁額四大字懸之祠宇以墨本給濬藏
守因摹勒奉於兩山祖祠以示寵榮焉方濬之從事斯
舉也客有詰之者曰白雲功德之始也捨彼圖此毋亦
以兩寺香火盛衰異勢將與寺僧規尺寸之利與濬應
之曰非敢然也白雲之為功德寺載之史冊人皆知之
今頽廢殆盡用艱力鉅未克輕復且前此已鼎新忠烈

廟矣去寺不數武報享有堂登降有序規制完善正本堂雖未建而香火固不患其湮滅也支砌去闌闌甚近惟藉春間匝月香火以供終歲齋薰諷唄而觀者朶頤蠶食僧人空乏今祠既建俾子孫入寺愬然思祖宗式憑在是相與維持而保護之亦欲使見之者念先賢香火所留或生甘棠之愛不至盡剪伐之而後已在寺僧當亦不忘厥主體劉公昔日立正本堂於白雲之遺意則是役也上有以妥先靈下有以馭族姓守僧蒙其休遊人

致其敬蓋先君子之志而濬之所樂觀厥成也客曰善
夫是不可以不記也遂書而刻之於石康熙四十有四
年歲次乙酉仲秋吉旦文正書院主奉十九世孫能濬
謹記并篆額二十世孫興禾書丹



范文正集補編卷五